



2024-4

20. december 2024

All. nr./brevnr.:

2023-104-0067-24

Sull./sagsbeh.: MS/kl

**Kommune Qeqertaliup allagaatinik takunnikkumalluni
noqqaassutip piffissaq suliap suliarineqarneranut atugaa
ombudsmandimit isorisarialittut isigineqarpoq**

Peqatigiiffik (matuma kingorna A) sullitani sinnerlugu (matuma kingorna B) 17. august 2023-mi B-p qitornai pillugit kommunip suliami allagaataanik takunnikkumalluni qinnuteqarpoq.

A ullormi 29. august 2023 suliap killiffia pillugu nukingisaaruteqarpoq, B-lu nammineerluni 26. oktober 2024-mi suliap killiffia pillugu kommunimut nukingisaaraluni.

Kommune suliami allajangiivoq 8. december 2023-mi, kisiannili kukkunikkut suliami allagaatit kukkusut tunniunneqarlutik.

A ombudsmandimut 12. december 2023-mi kommunip piffissaq suliap suliarineqarneranut atugaa pillugu naammagittaalliuteqarpoq.

Tamanna tunngavigalugu ombudsmandip suliamik misissuinini aallartippaa.

Kommunimit 18. april 2024-mi allagaatinik takunnikkumalluni noqqaassutip akuerineqarnera aalajangiiffigivaa, suliamilu allagaatit eqqortut tunniullugit.

Suliap suliarineqarnerani kommunip piffissaq atugaa qaammatini arfineq pingasuni ombudsmandimit isorisarialittut isumaqarfigineqarpoq.

(Oqaaseqaat 20. December 2024-meersoq, j.nr. 2023-104-0067)

Tamatuma kingornatigut imatut oqaaseqarpunga:

1. Suut misissorpakka?

1.1. Suliamik suliaqarninni aalajangersimavunga, allagaatinik takunnikkumalluni A´p noqqaassutaanut atatillugu, kommunip piffissaq suliamik suliaqarnerminut atugaa pillugu isummerfigissallugu.

Oqaatigissavara oqaaseqaatinni matumani isummerfiginnginnakku, 18. april 2024-mi aalajangiinerup suliassat suliarineqartarnerat pillugu inatsisip malittarisassartaanik aalajangiisarneq pillugu malinnittoqarsimanersoq, tassunga ilanngullugit tunngavilersuinissamut piumasaqaatit.

Taamatullu aamma isummerfiginngilara, kommunip 8. december 2023-mi aalajangiinikkut A allagaatinik takunnissinnaatitsinera, suliama allami attuumassuteqanngitsumi, innuttaasumut allamut suliamut tunngassuteqartumik. Pisimasoq tamanna Datatilsynimit suliarineqarnera innersuussutigaara.

Tamatumani innersuussutigaara Inatsisartut Ombudsmandiat pillugu Inatsisartut inatsisaanni nr. 7, 1. juni 2017-meersumi § 14, imm. 1, tassuunalu aalajangersarneqarpoq naammagittaalliut misissuinermik aallartitsinermut pissutigissallugu naammannersoq ombudsmandip aalajangissagaa.

1.2. Qallunaat Nunaanni inatsisilerineq pillugu atukkiasimasut Folketingillu Ombudsmandiata periaasia oqaaseqaatinni arlalitsigut aallaavigisarpakka, immikkoortunimi taakkunani Kalaallit Nunaanni inatsiseqartitsinikkut tunngaviusup Qallunaat Nunaanni inatsiseqartitsinikkut tunngaviusoq innersuussutinit taaneqartunit ersertutut pingaarnerusutigut assigimmagu.

Oqaaseqaatiga imatut tulleriinnilerneqarpoq:

- Immikkoortoq 2: Suliaq pillugu naatsumik oqaatigisassat
- Immikkoortoq 3: Inatsiseqartitsinikkut tunngavissaq
- Immikkoortoq 4: Kommunip isumaa
- Immikkoortoq 5: Uanga naliliinera

Oqaatigissavara suliap ingerlasimanerata allaaserineqarnera oqaaseqaammut tulliummat.

2. Suliaq pillugu naatsumik oqaatigisassat

A-p B sinnerlugu 17. august 2023-mi, B´p qitornaanut marlunnut tunngasunik suliami allagaatinik tamakkiisumik takunnikkumalluni qinnuteqarpoq.

A 29. august 2023-mi B´p qitornaasa inissinneqarnerinut angerlartitsinissarlu pillugu suliami allagaatinik tamakkiisumik takunnikkumalluni qinnuteqaqqippoq.

26. oktober 2023-mi B suliami allagaatinik tamakkiisumik takunnikkumalluni qinnuteqaatini pillugu akineqarnissamik nukingisaarivoq.

Kommune 8. december 2023-mi aalajangiissuteqarpoq, A-p allagaatinik takunnikkumalluni noqqaassutaa akueralugu. Suliamili allagaatit kommunimit A-mut nassiunneqartut B-mut attuumassuteqanngillat, innuttaasumulli allamut attuumassuteqanngitsumut tunngasuullutik.

A-mit uannut oqaatigineqarpoq, kommunip suliami allagaatinik kukkusunik tunniussisimanera pillugu naammagittaalliut, immikkut Datatilsynimut nassiunneqarsimasoq.

23. januar 2024-mi A kommunimut saaffiginnippoq B-p ikorfartuisussatut atorfinitseqqulluni noqqaassutaa pillugu.

29. januar 2024-mi kommune A-mut saaffiginnippoq, kommunip noqqaassutigalugu 23. januar 2024-mi e-maili paasinarsaqqullugu.

Kommunimit 18. april 2024-mi A-p allagaatinik takunnikkumalluni qinnuteqaataa akueralugu aalajangiissutigeqqinneqarpoq, kommunimillu nalunaarutigineqarluni suliami allagaatit apersuutigineqartut tamakkiisumik takuneqarsinnaasut.

Kommunimit sulisuma ilaanut e-malikkut 22. april 2024-mi nalunaarutigineqarpoq, kommuni Datatilsynimut nalunaaruteqarsimaneq pillugu immikkut suliamik ammaasimasoq.

3. Inatsiseqartitsinikkut tunngavissaq

Pisortat Ingerlatsineranni suliassat suliarineqarnerat pillugu Inatsisartut inatsisaanni nr. 8, 13. juni 1994-imeersumi kingorna allannguutitalimmi (matuma kingorna suliat suliarineqartarneranni inatsit) ersersinneqarpoq, suliarni ingerlatsineranut oqartussaasunit aalajangiiffigineqartumi aalajangiiffigineqarumaartumiluunniit peqataasup allagaatinik suliassanut tunngasunik ilisimatineqarnissani piumasarisinnaavaa.

Allatut oqaatigalugu imaappoq, suliarni pineqartoq suliarni allagaatinik imminut tunngasuni takunnissinnaanerminut pisinnaatitaaffeqartoq.

Suliat suliarineqartarnerat pillugu inatsisip § 10, imm. 1-iata malitsigivaa, allagaatit tamaasa, allakkat suliamut tunngasut tamarmik, nalunaarsuilluni allattukkat, allattugaatit aamma nalunaarsukkat allat allagaatit pineqartumut suliamut tunngasut.

Pisortat Ingerlatsineranni suliassat suliarineqarnerat pillugu Inatsisartut inatsisaanni § 16, imm. 2-p malitsigivaa, oqartussaasut piaartumik aalajangisavaat qinnuteqaat akuerineqarsinnaanersoq. Qinnuteqaat oqartussaasunit tiguneqarnermi kingorna ullut qulit qaangiutinnginneranni akuerineqanngippat itigartitsissutaappalluunniit oqartussaasut taakkua peqataasoq (qinnuteqartoq) tamatumunnga pissutaasumik kiisalu aalajangiinerup qaqugu tusarliutissanganeramik nalunaarfigissavaat.

Aalajangersakkap oqaaseqaatitaanit erserpoq, suliarni pineqartoq sapinngisamik piaartumik allagaatinik takunnissinnaatinneqassasoq, pisortat oqartussaataata tatiginassusianut pingaaruteqarmat.

Pisortat oqartussaataataat kukkussuteqarpat – tamatumunnga ilanngullugu allagaatinik takunninnissamat aalajangiinermi kukkuneq – ingerlatsinermi pissuserissaanissap malitsigivaa pisortat oqartussaataata innuttaasoq suliap

ingerlasimaneranik ilisimatissagaa ajuusaarfigalugu. Taamaattoqartillugu kommunip nammineq iliuuseqarnermigut pisussaaffeqarpoq kukkunerup iluarsinissaanik, ilisimaneqalerpat kukkusoqarsimanera.

4. Kommunip isumaa

Oqaaseqaatip matuma missingersuutaa kommunimut 19. november 2024-mi tusarniaatigineqarluni nassiunneqarpoq.

Kommunimit e-mailikkut 19. december 2024-meersutigut oqaatigineqarpoq:

“A-mut e-mailikkut paasiniaassutigineqartoq 29. januar 2024-mi nassiunneqartoq eqqaasitsissutigissavara, taanna akineqarnikuunngisaannarpoq.

A-p oqaasiliornerisigut paasisinnaanngilara suna noqqaassutigineraa.”

Kommunimit suliami allagaatit immikkut toqqakkat ilanngullugit uannut nassiunneqarput.

5. Uanga naliliinera

A 17. august 2023-mi B´p qitornai marluk pillugit suliami allagaatit tamaasa takunniffiginarlugit qinnuteqarpoq.

Kommunip aalajangiinermi 18. april 2024-mi innersuussutigivaa A-p 26. august 2023-mi allagaatinik takunnissinnaajumalluni qinnuteqaataa. Suliami allagaatinit takusaqarsinnaanngilanga A-p ulloq taanna kommunimut saaffiginnissimanersoq allagaatinik takunnikkumalluni noqqaassuteqarsima-nersoq.

A 29. august 2023-mi allagaatinik takunnikkumalluni qinnuteqaqqippoq B-p qitornaasa marluk, angerlarsimaffiup avataanut inissinneqarsimanerat aamma angerlarteqqinneqarnissaat pillugu suliap ingerlanneqarsimanera tamaat pillugu, allagaatinik takunnikkumalluni. Qinnuteqaat taanna nukingisaarutitut isigaara.

B 26. oktober 2023-mi allagaatinik takunnikkumalluni noqqaassutimi killiffia pillugu akineqarnissamik nukingisaaruteqarpoq.

Kommune 8. december 2023-mi aalajangiissuteqarpoq, kommunimit A nalunaarfigineqarluni tamakkiisumik allagaatinik takunnissinnaasoq. Kommuni-milli suliami allagaatit kukkusut nassiunneqarsimallutik.

A e-mailikkut 23. januar 2024-mi kommunimut saaffiginnippoq. Paasisara unaavoq, A-p e-mailikkut B-p ikorfartortinngortinneqarnissaminik noqqaassutaa pillugu killiffimmik paasiniaaneranut nukingisaarutaasoq.

Kommune e-mailikkut A-mut saaffiginnissuteqarpoq 29. januar 2024-mi, A-p e-mailerutaa 23. januar 2024-meersoq kommunimit ersarluttutut isumaqarfigi-neqarmat.

Paasinninnera unaavoq A-mit kommunip 29. januar 2024-mi saaffiginnissuta akineqarsimanngitsoq.

Kommune 18. april 2024-mi aalajangeeqqippoq A-p tamakkiisumik allagaatinik takunnikkumalluni noqqaassutaa akueralugu, tamatumuunalu suliami allagaatit eqqortut tunniunneqarlutik.

Uannut ersarinngilaq, kommune A-mut 29. januar 2024-mi saaffiginninnerminiit, 18. april 2024-mi allagaatinik takunnissamut noqqaassutip akuerineqarluni aalajangiiffiginissaata tungaanut sulerisimanersoq.

Naliliinera unaavoq, A-p Datatilsynimut nalunaarutiginninneraniit, uangalu kommunimut 20. december 2023-mi saaffiginninninni kommunimit paasineqarsimassagaluartoq, A-p apersuutigisaminik suliami allagaatinik takunnissimannginnera.

Kommunip qaammatini arfineq-pingasuni suliamik suliarinninnera isorisarialittut isumaqarfigaara.

Isumaqarpunga A-p siullermik 17. august 2023-mi allagaatinik takunnikkumalluni saaffiginneqqaarneraniit, kommunillu 18. april 2024-mi aalajangiissuteqarnerata tungaanut aamma allagaatinik eqqortunik tunnius-

sinerata tungaanut piffissaq suliap suliarineqarneranut atorneqartoq naammaginangitsumik sivisuallaartoq.

Tamatumunnga atatillugu pingaartippara, A-p allagaatinik takunnikkumalluni noqqaassutaata tigueneraniit ullut qulit qaangiunneranni, suna pillugu sulii aalajangiisoqarsimannginnera kiisalu qaqugu A naatsorsuuteqarsinnaanersoq qaqugu aalajangiisoqarsinnaaneranik nalunaaruteqarsimannginnera.

Taamatuttaaq pingaartippara, kommune tamakkiisumik allagaatinik takunninnissamik akuersisimammat, taamaattumillu naliliinera malillugu, annertuumik suliap suliarineqarneranut suliakkersuutaanani.

Taamatuttaaq pingaartippara, naliliinera unaammat, kommuni nammineq qanoq iliuuseqarnermigut pisussaaffeqartoq A-p tungaanut nutaamik aalajangiisuteqarnissaminik, kommunimit paasineqarmat kommunip kukkunikkut suliami allagaatit kukkusut tunniunneqarsimasut.

Naggataatigullu pingaartitara unaavoq, kommunimit allagaatinik tamakkiisumik takunnissinnaatitsisoqarsimammat, taamaattumik naliliinera unaasoq, suliap suliarineqarneranut atatillugu annertuumik oqimaarsaataasimasinnaanavianngitsoq, qaammatini arfineq-pingasut piffissap suliap suliarineqarneranut atorneqarnerata tunngavilersuutaasinnaaneranut.

Allakkat uku assilinerat A-mut nassiuppara.

Oqaaseqaat una ilisarnarunnaarsagaalluni nittartakkani saqqummiunneqarumaarpoq 2024-mullu nalunaarusianni eqqaaneqarumaarluni.

Allamik iliuuseqaqqissanngilanga, innersuussutigalugu, kommune inaarutaa-sumik allagaatinik takunninnissamat aalajangiisimammat suliamilu allagaatit eqqortut tunniussimallugit.

SULIAP INGERLANNEQARNERA

A B sinnerlugu 17. august 2023-mi kommunimut noqqaassuteqarpoq allagaatinik takunnikkumalluni, A-mit ilaatigut oqaatigineqarmat:

"[...]

Ulloq 25. juli nal. 16-ip missaani meeqqat marluutillugit pinasuartumik [...] inissinneqarput. Tamatuma kingorna meeqqat marluutillugit kommunimi atorfeqartinneqartunut ilaqutariinnut paarsisartunut inissinneqarput.

Inissiihermi tunngavigineqartoq tassaavoq, [...]

Matumuuna noqqaassutigaara meeqqat marluutillugit suliami allagaatini tamani takunnikkumallunga kiisalu ulluunerani neqeroorutip oqaasetanik.

A-mit 29. august 2023-mi kommune nukingisaarneqarpoq allagaatinik takunnikkumalluni noqqaassut akeqqullugu, A-mit oqaatigineqarmat:

"Siunnerusukkut noqqaassuteqarfiginikuuakkit [...] inissinneqarneranni tunngavilersuutitut aamma isumaginninnikkut taakkunanga misissuinerit pillugit allagaatinik takunnikkumallunga.

Aamma nalunngisassitut pisortat oqartussaataannut qulliunerusunut assigiinngitsunut naammagittaalliutinik nassiussaqaarnikuuvunga.

Ullumikkut oqaasiinnarmik aalajangiisoqaarnikuuvoq meeqqa marluutillugit ullualuit qaangiuppata angerlartinneqassasut pappialarsornitaat naammasseriarpata.

Matumuuna nalunaarfigissavassi, noqqaassutigigakku suliap ingerlanneqarsimanera tamaat pillugu allagaatinik takunnikkumallunga noqqaassutigigakku, tamatumunnga ilanngullugit suliami ullumikkut aalajangiissuteqaarnermi tunngavilersuut, tassani pineqarpoq meeqqat angerlartinneqarneraniit ukiup affaani nakkutigineqassanersut.

Qilanaaraara ullumimiit ullut 8-t qaangiutsinnagit suliami allagaatinik takunninnissanni tigusaqassagama. Aamma ilisinnut eqqaasitsissutigissavara inissiihermi suliap suliarineqarnera pillugu naammagittaalliornissami periarfissaq angajoqqaanut [...] tunniunneqarsimasut pillugit."

A 10. november 2023-mi kommunimut saaffiginnippoq, A-mit oqaatigineqarmat:

Tamatumunnga atatillugu B qinnuteqarpoq ilissi aqputigalusi imminut panimminullu tamakkiisumik innarluuteqaarneranut ikiorsiissuteqaarnissassannik, aamma peqputigalugu sammisaq tamanna siusinnerusukkut misilittagaqarfigimmagu.

A-miit neriutigaarput noqqaassut tamanna tungissinniit pinasuartumik suliarineqassasoq, tungissinnut innersuussutigissavara [...] noqqaassutigissagisi [...] napparsimanerata ingerlasimanerani allattugaatit qanoq iliortoqarsimanera pillugu siunissami atorfissaqartinneqartussat. Inussiarnersumik EQQAAMALLUGU B piginnaatitsissumik atsiortinneqartussaammat peqqussutsikkut nalunaarsuilluni allattugaatinik piniarnissami.

Naggataatigullu noqqaaffigissavassi aalajangiinermi allakkiaq B-mut nassiunneqassasoq.

[...]"

A 21. november 2023 kommunimut nukingisaaruteqarpoq, A-mit oqaatigineqarmat:

"Matumuuna nammineerluni qitornarisaq pillugu innarluuteqarnera pillugu ikorfartuiffigineqarnissamik qinnuteqaat nukingisaarutigaaara.

Ajunnginnerpaassaaq tusarfiginissarsi, suliap suliarineqarnissaani piffissaq atorineqartussami missingersuutissinnik."

Kommune 21. november 2023-mi A-p saaffiginnissutaanut akissuteqarpoq, kommunimit oqaatigineqarmat:

"Qujanaq nammineq qitornarisamut ikortuinissaq pillugu qinnuteqaatinnut, suliaq misissorsimalerparput, kisianni pisariaqartippagut [...] napparsimanerata ingerlasimaneranut tunngasut, taamaalilluta nassuiaasiussarput suliariniaasagatsigu."

Ulloq taanna A saaffiginnissut pillugu akissuteqarpoq, ilaatigut A-mit oqaatigineqarmat:

Siusinnerusukkut aallareernertut, [...] noqqaassutigissagisi [...] napparsimanerata ingerlasimanerani allattugaatit qanoq iliortoqarsimanagera pillugu siunissami atorfissaqartinneqartussat. EQQAAMALLUGU B piginnaatitsissumik atsiortinneqartussaammat peqqussutsikkut nalunaarsuilluni allattugaatinik piniarnissami."

B 26. oktober 2023-mi kommunimut allagaatinik takunnikkumanani pillugu nukingisaaruteqarpoq.

Kommune 8. december 2023-mi, A-p allagaatinik takunnikkumalluni noqqaassutaa pillugu akuersilluni aalajangiivoq. Tamanna tunngavigalugu suliami allagaatit arlallit A-mut nassiunneqarput. Suliamili allagaatit taakkua B-mut attuumassuteqanngillat, innuttaasumulli allamut tunngasuullutik.

A 12. december 2023-mi B sinnerlugu uannut naammagittaalliuteqarpoq. A-p uannut saaffiginnissutimi makkua oqaatigimmagit:

[...] noqqaassuteqarpoq panimminut [...] innarluutilimmut tapersersortinngortinneqarnissaminik, taassuma nappaataa suussuserneqarsimavoq tassaavoq [...]. B qinnuteqaatini pillugu suli akineqarsimangilaq naak qinnuteqaatini pillugu nukingisaaruteqartaraluarluni.

B sinnerlugu Kommune Qeqertaliup akissuteqartannginnera pillugu aamma piffissaq suliap suliarineqarneranut atorineqartoq pillugu naammagittaalliorpugut.

B arlalipassuariarluni B-p meeraasa 25. juli 2023-mi pinasuartumik angerlarsimaffiup avataanut inissinneqarneri ullullu 38-it qaangiunneranni angerlar-

tinneqartut pillugit allagaatinik takunnikkumalluni noqqaassuteqartarsimaga-luarpoq. (Allakkat filiat ilanngunneqarpoq).

B sapaatip akunnera kingulleq allagaatinik takunnissinnaanermik tigusaqarpoq, kisianni kukkunikkut inummut allamut allagaatit takunnissinnaanermut tunngasut tiguagut. Taakkua Datatilsynimut ingerlateqqinneqarput, allagaatit takunnissinnaanermut tunngasut tiguneqartut imaqarmata, inuttut ajornartorsiutinik allaaserinnin-nernik ilaqutariinnut allanut tunngassuteqartut. Kommune naammagittaalliuti-gaarput inatsitmmik "Pisortat ingerlatsineranni suliassat sularineqartarnerat pillugu Inatsisartut inatsisaat nr. 8, 13. juni 1994-imeersoq – §9, aammalu §16 malillugu" tunngavigalugu allagaatinik takunnissinnaaneq tunniunneqanngimmat noqqaas-sutigisatsitit."

Sulisuma ilaat e-mailikkut 20. december 2023-mi kommunip suliamik killiffia pillugu paasitinneqarnissamik noqqaassutigineqarpoq, tassunga ilanngullugu qaqugu naatsorsuutigineqarsinnaanersoq aalajangiisoqarnissaa tapersersortimik atorfinitsitsisoqarnissaa pillugu aamma allagaatinik takunnissinnaanermut aalajangiisoqarnissaa pillugu.

A e-mailikkut 8. januar 2024-mi uannut saaffiginneqqippoq, A-mit oqaatigineqarmat:

"Matumuuna Kommune Qeqertaliup B-p qinnuteqaataanik nammineq qitorminut tapersersortinngortinneqarnissani pillugu, taassuma nappaataa suussuserneqar-simavoq tassaasoq [...], tamatuma malitsigisaanik nappaatinik allanik nassatalik, akulikitsumillu misissorneqarlunilu katsorsagaasartussaammat, suliamik ingerlatsi-nera pillugu naammagittaalliutigineqarpoq.

Saaffigininneq qinnuteqarnikkut pisimavoq 10-11-2023-mi sulilu aalajangiiffigine-qarani. Kommunimit suliaq ingerlaannartumik sularineqartariaqaraluarpoq aalajangiiffigineqarlunilu.

[...]"

Sulisuma ilaanit kommune 10. januar 2024-mi suliap killiffia pillugu nukingisaaru-teqartoqarpoq.

A-mit 23. januar 2024-mi kommune nukingisaarneqarpoq, A-mit oqaatigine-qarmat:

"B-p nammineq qitornaminut tapersersortinngorniarluni qinnuteqaataa oktoberip qiteqqunnerani nassiunneqarpoq arlaleriarlunilu nukingisaarisooqartarluni, kingul-lermik decemberimi kiisalu aamma Inatsisartut ombudsmandianut naammagit-taalliortoqarluni.

Isorisarialerujussuuvoq, maanna qaammatit sisamat qaangiunneranni Kommune Qeqertalik suli aalajangiisimannngimmat, sullitagut allat qinnuteqaatini taamaattuni aalajangiinermik tigusaqareersimasut.

B-p pania inuunini naallugu atugassaminik nappaateqarpoq [...] ingerlaavartumik misissugaasarluni.

Matumuuna noqqaassutigaara aalajangiiffigineqannginnera tunngavilersuiffigeq-qullugu, qinnuteqaammut atatillugu aalajangersakkamik aamma naammagittaalliuteqarnissamut ilitersuummik. Qilanaarivara allakkiamik matuminnga tigusussat piaartumik suliamik suliaqarnertik iluarsiiiffigissagaat. Suliamik sullissisut Inatsit inatsisaat malillugu sulisariaqaraluarput."

Kommunimi pisortaaneq 29. januar 2024-mi [...] noqqaassuteqarpoq paaserusutaminik, pisortaaneq allammat:

" Asasara A [...],

Paasissutissamik pisariaqartitsivugut.

1) Kissaatigiviuk paasissutissat mianernartut najukkami ataatsimiititaliamut nassiunnarlugit, taakkuummata ukiumut atugassanik agguasartut?

- Najukkami ataatsimiititalianut ileqqoreqqusaq atualaarsiuk ugguna https://qeqertalik.gl/emner/om_kommunen/lokalraad?sc_lang=da

2) Kissaatigiviuk Kommune Qeqertalimmit suliaq ombudsmandimit tiguneqarsimanersoq uppersarneqassasoq?

3) aalajangiinermik kissaateqarpisi,

- "instans" ? instansi suna tunngavilersoqqusiuk?

- naammagittaaliornissamut ilitersuut (oqartussaasup alliunerup aalajangiinera oqartussamut quliunerusumut suliaassanngortinnissaa?) "suliap suliarineqarnera iluarsaattuunneqassasoq"? qanoq isumaqarpa?"

Kommune 30. januar 2024-mi aalajangiivoq B-p panimminut ikorfartortaanis-saanut nalunaaquttap akunneranut sullissisinnaasoq aalajangiinermik.

Kommune 26. februar 2024-mi nukingisaaqqippara, kommunimut eqqumaf-figeqqullugu ombudsmandimut paasissutissanik, ombudsmandimit piniarniarne-qartunik nalunaaruteqarnissaminut pisussaaffeqarmat. Aamma kommunimut eqqumaffigeqquara, saaffiginnissutikka pillugit kommune akissuteqanngippat, kommunimit naatsorsuutigineqassasoq, allamik iliuseqaaqqinnanga Inatsisartut inatsisinut Ataatsimiititaliaanut kiisalu Siulittaasup Naalakkersuisoqarfianut, ombudsmandeqarneq pillugu inatsimmi § 23 tunngavigalugu nalunaarutiginnis-sagama.

Kommunimit uannut 26. februar 2024-mi nalunaarutigineqarpoq, B-p allagaatinik takunnikkumalluni noqqaassutaa pillugu aalajangiisoqarsimasoq.

Sulisuma ilaat 14. marts 2024-mi kommunimi pisortaanermik oqarasuaatikku-ot qaloqateqarpoq. Sulisuma ilaata kommunimi pisortaaneq isumaqatigiissusior-figivaa, ilaatigut misissussagaa suliamik takunninnissami tamakkiisumik ilaannakortumilluunniit suliami allagaatinik takunnissinnaanermi akuersissute-

qartoqartoqarsimanersoq, aammalu kommunip aalajangiinermi allakkiaq suliarisimaneraa.

Sulisuma ilaat kommunimut e-mailikkut 26. marts 2024-mi, 5. april 2024-mi aamma 18. april 2024-mi kommunip akinissaa pillugu nukingisaaruteqaqqippoq.

Kommune 18. april 2024-mi aalajangiivoq, kommunimit oqaatigineqarmat:

“Allagaatinik takunnissinnaaneq pillugu

Kommune Qeqertalimmut 26. august 2023-mi allagaatinik takunnikkumallutit qinnuteqarputit, 8. decemeber 2023-mi paasissutissat kukkusut nassiunneqarput. Matumuuna paasissutissat eqqortut suliap misissoreerneratigut meeraq [...] pillugu nassiunneqarput.

Malinneqarpoq tak. suliat suliarineqartarnerat pillugu inatsit nr. 8, 13. juni 1994-imeersoq.” (uanga nutsigara)

Kommunimi pisortaanermit e-mailikkut 22. april 2024-mi sulisuma ilaanut nalunaarutigineqarpoq, kommune suliamik immikkut Datatilsynimut nalunaarutiginninneq pillugu ammaasimallutik. Kommunimit e-mailikkut 23. april 2024-mi uppersarsarneqarpoq, kommunimit B-p noqqaassutaa qitornaanut marlunnut suliat tunggassut pillugit tamakkiisumik akuerineqassasoq.

Allakkatigut 7. maj 2024-mi A nalunaarfigaara naammagittaalliutaat B sinnerlugu suliaqarnerarlunga, oqarama:

“E-mailitit ilanngussartallit 12. december 2023-meersut aamma 8. januar 2024-meersut ilanngussartallit tiguakka.

1. Saaffiginnissutit imatut paasivakka, B sinnerlugu B-p panimminut [...] tapersersortinngortinneqarnissaanik qinnuteqaataa pillugu Kommune Qeqertalimmit (matuma kingorna kommune) piffissap suliap suliarineqarneranut atorneqartup sivisuallaarnera pillugu naammagittaalliutigigit.

Imatut paasivara, B sinnerlugu e-mailikkut 10. november 2023-meersukkut tapersersortinngortinneqarnissaanut qinnuteqaateqarsimasutit. Tassunga atatillugu qinnuteqaatip kommunimit pilertortumik suliarineqarnissaanik noqqassuteqarsimallutit.

Sulisuma ilaannit kommuni attavigineqarpoq, tassanilu e-mailikkut 26. februar 2024-meersutigut uannut oqaatigineqarpoq, kommunimit 30. januar 2024-mi aalajangerneqarsimasoq, B 1. februar 2024-miit 30. april 2024-p tungaanut sap.ak-nut akunnerit 40-t [...] tapersersortinngornissaa aalajangiunneqarsimasoq.

Taamaalilluni suliamut atatillugu kommune aalajangiussaqaareemat, naammagittaalliutivit taannartaanut misissuinissamik aallartitsiniaranga aalajangerpunga. Inatsisartut Ombudsmandiat pillugu Inatsisartut inatsisaanni

nr. 7-imi, 1. juni 2017-imeersumi § 14, imm. 1 innersuussutigaaara, tassuunalu aalajangersarneqarpoq naammagittaalliuut misissuineramik aallartitsineranut pissutigissallugu naammannersoq ombudsmandip aalajangissagaa.

Isumaqarpunga suliap sukumiinerusumik misissorneratigut ilinnik inatsiseqartitsinikkut inissisimaneranut pitsaanerusumut ikiuisinnaanera ilimanangitsoq.

Taamatut aalajangernera atugassiissutinik annertunerusumik misissueqqinnerup nassatarisaanik atuineranut ataneqartillugu aamma isiginiarneqassaaq. Naammagittaalliuutit tigusakka uanga ombudsmanditut uannut atugassiissutaasut isiginiarlugit tulleriinnilersuiffisariaqartarpakka. Naammagittaalliuutivit taannartaanut atatillugu annertunerusumik iliuseqaqqissanngilanga.

2. Saaffiginnissutittaaq imatut paasivara, B sinnerlugu allagaatinik paasitinneqarsinnaatitaanermut noqqaasummut atatillugu piffissap suliap suliarineqarneranut atorneqartup sivisuallaanera naammagittaalliuutigigit. Imatut paasivara, A-p e-mailikkut 17. august 2023-meersukkut B-p panii marluk "[...] aamma [...] pillugit suliami allagaatit tamaasa pillugit paasitinneqarsinnaatitaanermik kommunimut noqqaassuteqarsimasutit. Imatut paasivara, 18. april 2024-mi kommuni aalajangiussaqaarsimasoq, tassa suliami allagaatinik paasitinneqarsinnaatitaanermut noqqaassut akuersarneqarmat, suliamilu allagaatit tamakkiisut pillugit paasitinneqarsinnaatitaaneq nalunaarutigineqarluni.

./. Kommune Qeqertalimmut (matuma kingorna kommune) ullumikkut allakkama assilinerat ilisimatitsissutitut ilanngullugu nassiuppara.

Suliami allagaatit kommunimit tigugukkit misissornissaannullu periarfissaqaleriaruma suliaq uterfigeqqikkumaarpara."

Sulisuma ilaanit e-mailikkut 18. juni 2024-mi kommune suliami allagaatit pillugit nukingisaarneqarpoq.

Kommunimi pisortaanermit e-mailikkut 18. juni 2024-mi sulisuma ilaanut oqaatigineqarpoq, 29. januar 2024-mi A paaserusutaminik noqqaavigisimallugu. Kommunimi pisortaanermit ilaatigut oqaatigineqarpoq sulisunnut:

"Mailikkut 29. januar 2024-mi A qinnuigaara kissaatiminnik uppersaaqqullugu [...]"

Mailitta akissutaanik tigusaqarsimanngisaannarpugut, aamma paasiuminaalaarsimasoq allagaatinik takunnikkumanermi noqqaassutigineqartoq imatut oqaasertalik: " aalajangiiffigineqannginnera tunngavilersuiffiqullugu, qinnuteqaammut atatillugu aalajangersakkamik aamma naammagittaalliuuteqarnissamut ilitsersuummik. Qilanaarivara allakkiamik matuminnga tigusussat piaartumik suliamik suliaqarnertik iluarsiiiffigissagaa. Suliamik sullissisut Inatsit inatsisaat mailillugu sulisariaqaraluarput."

Sulisuma ilaat e-mailikkut 20. juni 2024-mi kommunip pisortaaneranut saaffiginnipq, sulisunnit oqaatigineqarmat:

“Periarfissaqanngilanga A-p e-mailia 23. januar 2024-meersoq qanoq paasissanerlugu, kisianni kommune ilitsersorpara A-mik oqaloqatiginnineq aallartissagaa.

Allakkatigut ombudsmandimit 7. maj 2024-mi kommune noqqaavigineqarpoq A-p allagaatinik takunnikkumalluni noqqaasutaanut 17. august 2023-meersumut atatillugu allagaatit tamaasa piumallugit. Allagaatit ilanngunneqarsimasut tamakiisuuppat?”

Kommunimi e-mailikkut 20. juni 2024-mi suliami allagaatit arlallit uannut nassiunneqarput.

Oqaaseqaatip matuma missingersuutaa kommunimut tusarniaassutigalugu nassiuppara 19. november 2024-mi, kommune noqqaavigalugu suliamut oqaaseqaateqaqqullugu.

Kommunimit e-mailikkut 19. november 2024-mi oqaatigineqarpoq:

“A-mut e-mailikkut paasiniaassutigineqartoq 29. januar 2024-mi nassiunneqartoq eqqaasitsissutigissavara, taanna akineqarnikuunngisaannarpoq.

A-p oqaasiliornersigut paasisinnaanngilara suna noqqaassutigineraa.”

Kommunimit e-mailikkut uannut nassiussami ilanngunneqarput suliami allagaatit immikkut toqqakkat.